



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim




tir_yimyim



tir yimyim

TAPAK 8



Iran-i senotsü tsütsü timtem tulutiba ajurutsü: Scott Bessent



Gauff aser Fils nati Cincinnati Open titles benogo

VOL. XXIII ISSUE NO. 313 (ADOK 313) DIMAPUR SANGTENNÜ (TUESDAY) LUROI (AUGUST) 25, 2026

₹ 5.00

CJP-i Sep 5 nü Delhi nung lungkak aittsü



New Delhi, August 24, 2026 (Agencies): Cockroach Janta Party (CJP)-i September 5 nü New Delhi nung lungkak aita jajaba sentong ka alitsü metetdaksüogo.

Centre sorkari olemtepdang nangzükba ama meinyaker aser iba anema lungkak aittsü ta CJP-i ashi.

Iba sentong ya Teachers' Day nung agitsü aser India Gate nungi tenzüker Delhi Police

Headquarters nung tembangtsü ta parnoki ashi.

NEET examination athiba aser iba sülen re-test agiba mapang pei sasa sosetba kaketshirtem kibongtemi anir iba sentong agitsü. July ita lungkak aitdang police-i tashiyim inyakba kaketshir kibongtemia shilem agitsü ta CJP-i Hombarnü ashi.

"Sorkari jembiba ama inyaktsüla. Onoki aremzüka ataba ya onok tashimait ama mebilemtsüla" ta parnokisa ashi. Centre-i tongtipang onüktem meinyaker. Parnoki FIRs meyipa agitsü menur aser lungkak aitertermi temerenshi mangutsü nangzükba ama meinyaker ta CJP-i ashi.

September 5 sentong ajanga CJP-i dang July 25 olemtep nung nangzükba ama mapatem inyaktsü rongshitsü.

Noklak kübok New Pangsha nung ASF putet

Dimapur, August 24, 2026 (TYO): New Pangsha village nung African Swine Fever (ASF) aliba bushitetba sülen Noklak district administration-i tenokdangbatem agütsüogo.

New Pangsha village nungi sample agiteter Guwahati nung Animal Health Centre, NERDDL, Khanapara nung laboratory tests asü dang ASF aliba puteta liasü ta Noklak Deputy Commissioner, P Mono Khiamniungan-i ashi.

Iba yimtsüng aser temeket

nung ak aika asüba osang Chief Veterinary Officer, Noklak office-i sangoktsüba sülen sample tendanga liasü.

ASF ya ak dak kanga menatepa aoba tashidak ka lir aser iba ya azüoktsü atema teinyaktsü aika nüngdaker ta district administration-i ashi.

New Pangsha village nungi kilometer 1 telongtet 'Infected Zone' aser kilometre 10 telongtet 'Surveillance Zone' ta administration-isa metetdaksüogo.

Meghalaya sorkari KSU den olemteptsü jaoker

Guwahati, August 24, 2026 (Agencies): Meghalaya state sorkari Khasi Students' Union (KSU) den onük pungu olemteptsü jaokogo ta Chief Minister Conrad K Sangma-i ashi.

KSU-i onük pungu akhangba atema jembitsü sorkari renema lir. Onük teimbaka atema mapa tenzükogo saka telok ana tsüngda tongtepratep shitak maliba ajanga mangatettep adok ta CM Sangma-i ashi.

KSU tanishirtem apuba aser parnok anema Meghalaya Maintenance of Public Order Act (MMPO) aser Meghalaya Preventive Detention Act (MPDA) benshioo aser ozüng lateta aliba ama inyaktsü ta paisa ashi.

Telok mesüra kija kari rongshiba ajanga sorkari ozüngren meraksatsü mesüra paitoka meinyaktsü. Iba ken o ya teinyaktsü tim inyaka aotsü ta CM Sangma-isa metetdaksü.

Paisa August 19 nü ozüng

alema inyaksangshiba atema bushisüngdanga aruba osang lemsatep. Iba tatalokba dak sendakba nung tejak meibanger nisung pungu maitsü jangjaogo aser parnok anema ozüng teinyaktsü inyaktsü. Iba tatalokba nung tanüngba shilem agirtem putetra parnoka ozüng tapet agi merenshitsü ta Sangma-i ashi.

Sorkari rallies aser processions dak sendakba inyakyim akangshitsü. Iba motorcycle rally lenmang nung security personnel mapa lemozükja liasü saka tesem balala nung atalokba ajanga ketdangsürtemi timtem ajuru ta paisa metetdaksü.

Iba tatalokba ya intelligence tamakoktsü liasü. Administration-ibo rally tiptema agitsü ta imla saka nisungtemi iba amai ozüng alema inyakba yabo mebilemdangi aliba ka liasü ta CM Conrad Sangma-isa ashi.

State sorkari KSU den onük pungu jembitsü mulunga lir ta paisa shisem.

MKG DC-i Dr. Ambedkar Medical Aid Scheme osang metetdaksür

Disease	Maximum Ceiling (Rs.)
Heart Surgery	Rs. 1.50 lakh
Kidney Surgery/ Dialysis	Rs. 3.50 lakh
Cancer/Surgery/Chemotherapy/ Raditherapy	Rs. 2.50 lakh
Brain Surgery	Rs. 2.00 lakh
Kidney/organ transplant	Rs. 3.50 lakh
Spinal Surgery	Rs. 1.50 lakh
Other life-threatening diseases	Rs. 2.00 lakh

Dimapur, August 24, 2026 (TYO): Mokochung Deputy Commissioner ajanga Dr. Ambedkar Foundation (DAF) kübok medical aid agütsüba osang metetdaksüogo.

Dr. Ambedkar Foundation-i July 27, 2026 nü shidi ka ajanga Dr. Ambedkar Medical Aid Scheme indang osang sangokja liasü.

Iba dak sendakba osang tejangja parnok indang official website- dosje.gov.in nung angutsü ta DC Ajit Kumar Verma, IAS-i sangdong nung shiogo.

Iba scheme ya Scheduled Caste (SC) aser Scheduled Tribe (ST) nungi shirangertem asoshi lir aser organ transplants, spinal surgeries, kidney, cancer, brain amala timtem dena taküm samatsüsa tashidak tulutem atema teyari agütsür.

Iba teyari ya küm nung Rs. 5,00,000 teküpok anguba kibongtem aser shirangertem AB-PMJAY aser CMHIS kübok malirtem nem agütsür.

Iba teyari aginürtemi Director, Dr. Ambedkar Foundation, 15 Janpath, New Delhi 110001 dangi treatment asütsü anogo 15 jakdang nüngdakba kulikakettem dener shidi zülutsü akok.

Kulikakettemji Caste/Tribe certificate, Deputy Commissioner's Office nungi agütsüba Income Certificate, Ration card/Aadhaar card, Hospital nung Medical Superintendent ajanga kuli agütsüba surgery/transplant/ dialysis/Chemotherapy nung endoktsü ta asadangtetba sen (enclosed as Annexure-II).

Iba teyari ya applicant indang account-i masü saka bangdak Hospital dangi indangindanga yoktsü (maximum ceiling limit).

Dr. Ambedkar Medical Aid Scheme ya Ministry of Social Justice and Empowerment, Government of India kübok Dr. Ambedkar Foundation (DAF) ta ser autonomous organization kati ketdangsüa repranger.

Iba scheme kübok Recognized Hospitals tsünglanglen agütsür:

- All India Institute of Medical Sciences (AIIMS), New Delhi and AIIMS in other States*
- All CGHS approved Hospitals as revised from time to time by the Ministry of Health & Family Welfare, Government of India.*
- All State Government Medical Colleges attached Hospitals even if not included under CGHS Scheme.*
- All State Hospitals and All Hospitals recognized by State Government*
- All Hospitals fully funded by either the Central Government or the State Governments*
- All Government Hospitals in District Headquarters/ major towns where surgery or treatment facility for Kidney, Heart, Liver, Cancer and Brain or any other life threatening disease including organ transplant and spinal surgery is available*

Senapati nung telok ana khatepdang CRPF ketdangsür ka yiru

Imphal, August 24, 2026 (Agencies): Manipur kübok Senapati district nung Hombarnü Naga aser Kuki nunger tsüngda raradang CRPF personnel ka yiru aser ki ana nung mi senoktsü.

Tanep 10:00 ako meta teloktem tsüngda khatepdang 36th Battalion, CRPF nung Sub-Inspector (General Duty) Pradeep Singh tetsüng nung injang agi yiru. Pa Senapati Hospital nung anepalutsü anir ogo ta ketdangsürtemi ashi.

Tanep anepongi mejangjatetba nisungtemi ki ana nung mi senoktsü sülen tanep 9:30 ako meta telok ana tsüngda khatep. Ki ka Kuki nunger aser ka Poumai Naga nunger meyong liasü ta police-i ashi.

Iba tensa azüoktsü aser rara madoktsü atema Taphou area nung security personnel talila mapa lemozüktsüogo. Ozüng alema inyaksangshitsü ta tebilemtsü bena iba tesem nung alir aikati pei talidak toktsür ogo.

Kuki telungpur teloktemi Liangmai Naga village amak ta yimdaklirtemi ashi saka iba kuli mengutet lir.

Külen, lungkak aitertermi

Senapati headquarters anasa Dimapur den Imphal sendaktepba National Highway-2 mokdanga lir. Parnoki highway nung tyres aser jana rongdoka noktanger.

Kuki nunger ki ka rongdoktsüba aitsür aser iba mapa ya tesempatsüka, meimchiri meinyakba aser magizüker ta Taphou Kuki Village Authority-i ashi.

Parnokisa district administration aser police dang iba mapa inyakerterm maitsü jangjatsü aser ozüng tapet mapa inyaktsü takhangba agütsüogo.

Taphou Kuki Village Authority-isa ki rongdoktsürtem dang ghonda 24 tsüngda parnok dangi arutsü aser Kuki customary law nung aliba ama ken o angatetteptsü mapang züngzüktsüogo.

Iba tatalokba ajanga Naga aser Kuki nunger tsüngda mepetmesü tali adokdaksüogo.

May 13 nü Noney aser Kangpokpi district tem nung mejangjatetba nisungtemi tesem ana nung amakdang nisung pezü tepset. Tasürtem rongnung arogo lennir asem aser Naga nunger ka dena liasü.

Iba tatalokba sülen Naga aser Kuki-Zo nungeri tayang

küpzüktepba civilian 48 tashi apu. Ita ka sülen civilian tem chiook saka Kangpokpi district kübok Kharam Vaiphei village anasa Naga nunger trok tepseter lia angu.

Iba ken o ya National Investigation Agency (NIA)-i bushisüngdang südar aser July ita apuani ka dena nisung pezü puogo.

Maneni, Committee on Tribal Unity (CoTU), Sadar Hills, aser Ihang-Bungpi Working Committee ajanga Kangpokpi district nung Kuki yimtsüng ana amakba aitsüogo.

Telungpurtemi Leplen village amakba aser Taphou Kuki village nung mi senoktsüba ya tenemlen mepetmesü tasen adokdaksütsü atema inyak ta parnoki ashi.

NSCN-IM züngsemtem den Liangmei nungeri iba mapa ya inyak ta CoTU-i tai tongloktsü.

NSCN-IM züngsemtemi Hombarnep 12.20 ako meta Leplen village amak aser idangji civilian ka yirutsü ta Ihang-Bungpi Working Committee-i tai tongloktsü.

Seneikethil village nung aliba telungpurtemi Leplen telungi ait aser yimdaklirtem o local travelers dak injang khaloktsü ta parnoki ashi.

NCM Choir temi Mokokchung nung worship concert ayongzüksü



Dimapur, Luroi/August 24 (TYO): Nagaland Conservatory of Music Choir ajanga August 30, 2026 nikongdang 5:00 ako nungi Mokokchung Town Baptist Church nung special Worship Concert ka ayongzüksü. Iba concert ya Mokokchung nung aliba kin ajungai reprangtetsü aser yangji tekülem, fellowship aser choral music alitsü.

Nagaland Conservatory of Music Choir ya India aser bendang lima tesem balala nungi ken tena jajaba nung kanga nüngtugu kumogo. Parnok choir yagi India tenüng nung Norway, Belgium, Spain aser Ireland amala linüktem nung international sapang nung shilem agia aru aser tang tesüsa Chiang Mai, Thailand nunga oa shilem tajung agia liasü.

Item linük nung parnoki ken tena jajaba mapang sobaliba tajung aser Nagaland nung

choral ken atenba nung tangar menepa akumba alima tesem balala nung sayua arur.

Iba concert ya Lipokmar Tzudir-i anir agitsü, shiba India nung tejangia choral conductors rongnung ka lir. India nung küm 20 dak tema choral music aser music education tajungba kumdaktsüba nung Lipokmar Tzudir-i shilem tajung agia aru. Pa ya 2009 nungi 2010 tashi Patkai Chorale ketdangsüa liasü aser iba sülen Nagaland Singing Ambassadors tenzüka ajia pai 2010 nungi 2012 tashi ketdangsüa liasü.

2005 küm Tzudir-i Mokokchung Chancel Choir tenzüka linüki meteta akum aser konang tetushi aika ngua liasü.

2012 küm pai Nagaland Conservatory of Music (NCM) lapok, koba music education tajung agütsütsü aser kentener akumtsü jangra alir asoshi maongka agütsütsü atema

lapokba reju ka lir.

Pa lenisüba kübok NCM-i music educators, performers aser music tsütsü tarutsü lenirtem tajungba kumdaktsütsü temulungtetba nung lir. Tanübo Nagaland Conservatory of Music ya Nagaland University nung affiliate süa lir aser linük nung music education asoshi tongtipang reju ka kuma linük tesem balala nungi arua music nung training agir.

Mokokchung Worship Concert nungya choir temi 'sacred music, African-American spirituals, contemporary Christian compositions aser traditional hymns' amala ken tabu balala atentsü.

Anungji iba concert nung Mokokchung aser temeket tesemtem nung aliba nübur ajunga arua adentsü pelashishia jaoker, ta Nagaland Conservatory of Music Choir ajanga ashi.

Mokokchung DPDB senden August 27 nü amentsü

Dimapur, Luroi/August 24 (TYO): Ita shia amenba District Planning & Development Board (DPDB) senden August 27, 2026 anügdang 11:00 ako nungi tenzüka Deputy Commissioner, Mokokchung indang Conference Hall nung amentsü,

ta Deputy Commissioner & Vice-Chairman DPDB, Mokokchung, Ajit Kumar Verma, IAS ajanga sangdong ka nung metetdaksüogo.

Paisa züngsem ajunga dang iba senden nung medema arua adentsü ayongzüka liasü.

Under Secretary Yadav-i Mangmetong semdang



Dimapur, Luroi/august 24 (TYO): Under Secretary, Ministry of Development of North Eastern Region (DoNER), Mahipal Yadav-i August 22, 2026 nü Mokokchung district kübok Mangmetong yimtsüng semdanga liasü.

Pai iba mapang Government

High School Mangmetong Village yanglutsü atema tesem semdanga liasü.

Iba mapang Yadav-i school principal, putu yimsüsür aser lenirtem den sensaksema liasü. Pai Detailed Project Report (DPR) nung aliba ama mapa inyaker asü masü ta jangjatsü atema tsüngtong aru ta ashi.

ADC Medziphema-i Solid Waste Management atema metetdaksür

Dimapur, Luroi/August 24 (TYO): Medziphema Town nung shisaa aoba jana ketdangsüba decentralized asütsü aser jila müreka alitsü tangatetba nung Medziphema Town Council-i kidang nungi adokba 'biodegradable kitchen waste' ketdangsütsü tema composting facility tapet yanglua anepalutsü, ta ADC & Executive Officer Medziphema Town Council, P. James Swu (NCS) ajanga metetdaksüogo.

Tesem peria maliba aser asangang nung inyaktsü tamakoktsü asüba yong kibong shia jana bensen shisaa yokdaktsütsü tamakoktsü, anungji kibong temi tapet tesem nung 'clusters/common composting arrangements' yanglutsü akok, ta ashi.

Kibong ajungai iba sangdong agütsür anogo 30 tsüngta mapa kuma inyaktsüla aser ward sanitation committee-i nüngdakba nung yaritepa 'cluster-based composting' ya yanglutsü.

Iba totuyuba sülen manidaker mesüra kidang nungi adokba 'biodegradable kitchen waste' tem Town Council jana bendenba nung indokra, iba totuyuba nung manidaker ama züngshitsü aser Solid Waste Management Rules 2026 kübok shia aliba aser tapet ozüngtem nung aliba ama merenshitsü, ta ashi.

Iba totuyuba shidak inyaktsü ajak dang ayongzüker. Iba totuyuba tang nungi shidak amshitsü, ta ADC Medziphema ajangasa metetdaksü.

Dimapur nung industrial units atema awareness sentong ayongzü



National Clean Air Programme (NCAP) kübok industrial units atema special awareness aser sensitization sentong ka August 24, 2026 nü Hotel Saramati, Dimapur nung agidang tangokba noksa ka yangi angur.

Dimapur, Luroi/August 24 (TYO): National Clean Air Programme (NCAP) kübok industrial units atema special awareness aser sensitization sentong ka August 24, 2026 nü District Industries Centre (DIC), Dimapur ajanga Nagaland Pollution Control Board (NPCB) den lungiemer Hotel Saramati, Dimapur indang Conference Hall nung ayongzüka liasü.

N Abeno Lotha, Functional Manager, DIC, Dimapur ajanga iba sentong ayongzüka nükjiding lemsatepba mapang, industrial development aser libajen wazüka ayuba sako asütsü tongtipang lir ta ashi.

Mopung müreka ayutsü atema industries temi inyaktsü

tongtipang shilem lir, ajungji industrial operators temi libajen meraksatsüsa yimyatem amshitsüla, ozüng nung aliba ama tim departments den teka amteper inyaktsüla, ta lai ashi.

Yanathing Kithan, Scientist-B, NPCB ajanga iba sentong nung "Ambient Air Quality and Its Impact" onük nung ajemdaker jembidang 'ambient air quality' tetetzü rateta ashi aser mopung menendaktsüba sources tulutem indanga lemsatepa liasü.

Pai 'particulate matters' aser tanga pollutants ajanga nisung temang aser libajen nung timtem agütsüba indang rateta ashi aser mopung müreka ayutsü atema ajaki inyaktsü nüngdaker aser yangji industries, sorkar

agencies aser nüburtemi shilem agitsüla, ta ashi.

"Environmental Compliance of Industries" onük nung ajemdaker technical session mapang Aghali A Swu, Senior Environmental Engineer, NPCB ajanga industries atema libajen nung nüngdakbatem rateta ashi. Laisa mopung menenba kanga junga azüoktsü atema mera agitsü, mapang shia tendangtsü, pollution-control equipment junga anepalutsü aser jana kanga junga ketdangsütsü indanga lemsatepa liasü.

Iba sentong nung Lucy Ngouri, Functional Manager, DIC, Dimapur menden liasü aser industrial units aser stakeholders tem dena liasü.

Kohima nung NGOs aser CSOs nem tetushi agütsü

Dimapur, Luroi/August 24 (TYO): Kohima nung 80 buba Independence Day mapang nüburtem asoshi mapa tajung inyakba temaitsü Kohima District Administration ajanga NGOs aser Civil Society Organisations (CSOs) nem Certificate of Appreciation agütsüba sentong ka August 21, 2026 nü agia liasü.

Iba sentong nung Deputy Commissioner, Kohima, B. Henok Buchem, NCS-i jembidang NGOs aser CSOs temi timtem nung alirtem dang aria bilema temeim sayuba asoshi pelaba lemsatepa liasü. Independence Day ya yimtenren tsütsü nüjiso anguba anogomung kisüng masü saka khuret angatetba senso jangjaba

anogo lir, ta pai ashi.

Timtem nung alirtem tenzüka ya linük tenzüka den sako lir ta pai ashi aser sorkar den yarisema timtem nung alirtem yariba atema NGOs aser CSOs tem dang pelaba lemsatepa liasü.

Iba sentong nung Angami Public Organisation tir, Thejao Vihienuo; Kohima Chamber of Commerce & Industry; Nagaland Contractors' and Suppliers' Union; Classic Club aser Kohima Press Club nungi ketdangsür temia parnoki ajangshiba tem lemsatepa liasü. NGOs, CSOs aser lokti balalai mapa tajung inyakba temaitsü iba sentong nung Certificates of Appreciation agüja liasü.



August 24, 2026 nü Nagpur yimti kübok Godhani yimdak water treatment plant ka nung chlorine gas leak asüba sülen tangokba noksa nung angur. Anepongi 1:00 ako nung 900-kg capacity chlorine gas cylinder leak asüba sülen nisung aika hospital-i anir ogo.

TamilNaduCM-iLPGcylindersasemsemangati agütsütsü sangdong

Chennai, August 24 (Agencies): Hombarnü Tamil Nadu Chief Minister, C Joseph Vijay-i, 'Annapoorani Super 6' scheme kübok küm shia kibong nung tetsütem shia nem liquefied petroleum gas (LPG) cylinders asemsem angati agütsütsü; iba scheme ya January ita nung Pongal benjung mapang nung tenzüksü, ta metetdaksü.

Iba scheme atema küm shia sen crore 4,000 lezmütsütsü aser ibaji ajanga temsüa aliba kibong crore 1.30 tajangzük angutsü. Iba scheme kübok senotsüji Direct Benefit Transfer (DBT) ajanga bank accounts nung inoktsütsü.

Assembly senden nung jembidang Chief Minister-i, iba scheme ya ajanga küm ka nung sen lakh 2.5 den tajemba angur kibongtem, kanga sensakertem, tilateri aluyimertem aser matamabensar kibongtem

tajangzük angutsü, ta metetdaksü.

Iba scheme kübok cooking gas cylinder atema senotsüji 'reimburse' süja kibong nung tetsütem indang bank accounts nung indangindanga inoktsütsü.

Chief Minister-i, Gulf region nung rara ajanga alima nung supply chain raksaogo aser jenjang kanga atur, aser ibaji ajanga tesüiba ita pezü tashi kibongtem aikati timtem kanga ajangshir, ta ashi.

"Item ajakji asadanger kibongtem rongsenketzüng khuret pungbatsütsü nükjidong nung aser nüburtem dang nangzükba atalokja gas cylinders nung indokba senotsüji nüburtem nem agütsütsü atema ozü sorkari telemetba agiogo. Anungji mezüngbuba shilem nung kibongtem nung tetsüitem nem tajangzük agüja 'Annapoorani Super 6' scheme kübok küm shia gas cylinder

asemsem angati agütsütsü. Iba scheme atema maparem tenzükogo aser iba scheme ya January ita nung Pongal benjung mapang nung tenzüksü, aser küm shia iba scheme atema sen crore 4,000 lezmütsütsü," ta Chief Minister-i metetdaksü.

'Vetri Vision Document' kübok tetsürtem nem tashi agütsütsü atema 'Singa Pen' special task force, 'Thaimaman Thangamotheeram', 'Vetri Magalir Adugal Valarppu' aser 'Annanin Seer' schemes atema senotsü lezmütsütsü, ta paisa metetdaksü.

Item schemes ya tetsürtem kümzüka alitsü, loktiliba nung renloktsü aser rongsenketzüng jenjang tajungba akümsü atema lir, ta paisa shisem.

Chief Minister-isa, 'Vetri Payanam' scheme kübok October 2 nungi tetsürtem aser 'transgenders' bus nung senzüba angati asütsü, ta metetdaksü.

Karnataka draft electoral roll nungi tenüng crore 1.08 agienogo

New Delhi, August 24 (Agencies): Karnataka nung Special Intensive Revision (SIR) agiba sülen Hombarnü draft electoral rolls sangdongogo.

Draft roll nungji voters crore 4.46 shi lir aser tang aliba electoral roll nung aliba tenüng crore 1.08 bo Absent, Shifted, Duplicate, Dead and Others (ASDDO) category nung lir.

SIR kübok August 17 tashi nung anogo 49 tashi door-to-door enumeration exercise agia liasü.

State nung aliba sensotemi Chief Electoral Officer (CEO) indang website nung draft roll ji reprangtsü akok. Ajisüaka technical timtem balala ajanga website crash süa aikati PDFs download mesüteter.

Draft rolls sangdongba sülen sensotemi August 24 nungi September 23 anogo tashi nung

tashishiba agütsütsü akok, ta ketdangsertemi metetdaksü.

Draft roll nungi züngdokbapurtemi Form 6 agütsütsü akok aser bendanglen aliba voters-i Form 6A agütsütsü akok.

Election Commission-isa item forms den külemi birth certificates, passports, matriculation mesüra educational certificates, permanent residence certificates, caste certificates, sorkari agütsüba identity documents, ali mesüra kiojen allotment certificates aser family registers agütsütsü akok, ta metetdaksü.

Draft roll nung tenüng agienba atema tashishibatem aser temepishiba ajak asadanga tenüng züngokba mesüra züngdokba sülen final electoral rolls ji taküm October 27 nü sangdongtsü.



August 24, 2026 nü New Delhi nung Communications & Development of North Eastern Region (DoNER) Union Minister, Jyotiraditya M. Scindia-i SPAs semzüksüba aser Dak Sewa & Dak Mitra Apps tenzüksüba mapang tangokba noksa nung angur.

Tanü Beijing yimti nung India aser China arrtsü ken o jembitsü

New Delhi, August 24 (Agencies): India national security adviser (NSA), Ajit Doval Hombarnü China yimtiba, Beijing tonga ogo aser Bodhbarnü pai China foreign minister Wang Yi den senden mena India-China arrtsü ken otem jembitsü.

Ministry of external affairs (MEA)-i, Wang Yi-i jaokba nung ajemdaker Doval-i Beijing semdang, ta metetdaksü.

Tesüiba küm aika Himalayan arrtsülen linük ana tsünga mangatettep adoka aruba sülen linük anapronglai tensa süngjemtsü atema jembishinüa arudar.

"NSA Doval-isa China tatong Tir, Han Zheng-a ajurutsü," ta MEA-i metetdaksü. Linük ana tsünga talisa India-China arrtsü dak sendakba ken otem jembitsü, iba denji külemi mangatettep onüktem bentettsü aser Line of Actual Control (LoC) nung tesünep alitsü aser yimjung atema jembitsü.

Chinese foreign ministry otongdar, Lin Jian-ia, lenirtemi tamalen bangjema aliba ama ketdangsertemi maneni o lemteptsü, ta metetdaksü.

India aser China na tsünga arrtsülen kilometer 3,500 nungbo mangatettep adoka lir.

2020 küm anüdoklen Ladakh nung India aser China sepaitem raraba sülen linük ana tesendaktep kanga mejungi aküm, aser iba mapang nungjagi tenzüka mangatettep ken otem bentettsü aser tensa süngjemtsü atema sepai ketdangsertem aser yimtenren lenirtemi maneni ken o jembia arudar.

Taküm June ita nung China Foreign Minister, Wang-i New Delhi semdanga BRICS National Security Advisers senden nung dena liasü, aser iba mapang nungji linük anati tesendaktep jenjang asadanga liasü, ta MEA otongdar, Randhir Jaiswal-i metetdaksü.

CJP-i India Gate nungi Delhi Police HQ tashi longkak aita jajatsü

New Delhi, Luroi/August 24 (Agencies): Cockroach Janta Party (CJP)-i September 5 nü linük yimtiba, Delhi nung longkak aita jajatsü sentong ka ayongzükogo.

July 25, 2026 nü sorkari lanurtem dang nangzükba mataloktsüba nung ajemdaker longkak aittsü, ta CJP-i metetdaksü.

NEET candidates soseta asürtem kinüngertem aser police-i tashiyim amshiba ajanga takoksa angurtem leniba nung longkak aita jajatsü. Iba sentong nung kaketshirtem aser lanur organisations aikati shilem agitsü.

Sorkar dang July 25 anogo nung nangzükba ajak atangji atalokjang, ta takhangba agüja longkak aittsü ta CJP-i metetdaksü.

September 5 nü lanurtemi India Gate nungi longkak ait tenzüka New Delhi Police Headquarters tashi jaja aotsü, ta CJP-i metetdaksü.

CJP National Working Committee senden nung Union sorkar aser NDA-i yimsüsüba

state tem nung sorkari nangzükbatem asadanga liasü.

Item tenangzükba sülen joko ita ka ajunger, ajisüaka nangzükba ama meinyaker; sorkari item tenangzükba ataloktsütsü tebilemba ali asü mali?, ta CJP-i asüngdang.

Sorkari menoa tenangzükbatem mataloktsüba ajanga lanurtemi longkak aittsüba dak alaka tanga lenmang kecha mali, ta parnoki metetdaksü.

"Onoki aremzüka atabaji tashimait ama mezüngshitsüla. Onoki tamang katetba nungi sorkari maongka agia iba linük nung lanurtem mashioktsütsüla," ta National Working Committee-i metetdaksü.

CJP-i kaketshirtem, lanur organisations aser lanurtem dang India Gate nung adenshia longkak aita jajaba nung shilem agitsü ayongzükogo.

CJP-isa, longkak aibtaji tesünep nung aser democratic yimya nung agia sorkar dang lanurtem dang nangzükbaji atangji atalokjang ta akhangtsü, ta metetdaksü.



August 24, 2026 nü Jaipur nung Miss Universe India 2026 tetoktepba nung takok angur Kaziah Liz Mejo (abelen nungi tasembuba), first runner-up Vaishnavi Ganesh (ajichilen nungi tanabuba) aser second runner-up Anushri Satavlekar (abelen nungi tanabuba) nungeri Bollywood actress, Sushmita Sen (ajichilen nungi tasembuba) den tangokba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 25, 2026

Tangarbo ILP junga amshiteter !

British yimli kübok liasüba nungi India yimten nüchiso ngur külena India nung Inner Line Permit (ILP) amshiba ya Naga lima nung tama tenzüker asütsü südi, kechiyong tang Naga lima nungbo British yimten yimli mapang 1873 küm nungi Inner Line Permit ya amshia aru aser Assam den külemi state ka ser liasüba nungi kodang 1963 küm Nagaland state balaka razüka aküm, iba mapang nung jagi ano ILP ya Nagaland nung maneni amshitsü akangshia latet. Ibayongji, tanü tashi Nagaland nung Inner Line Permit amshir. Atangji, Inner Line Permit ya Naga nung masüba nübo shirnoksa Nagaland-i aruner parnok asoshi temela agütsüba inyakyim ka lir. Ajisüaka, ILP ya Nagaland nung arua alitsü asoshi temelaba agütsüba kakat ka masü saka anogo tezüngtet ka asoshi Nagaland nung aruagi amongtsü asoshi temelaba agütsüba kakat ka lir. Ajisüaka, iba ozüng inyakyim ya Nagaland nung alir Naga nungertemi mangatet aser angateta mali südi ta bilemer. Ibayongji, ILP liaka, Nagaland nung Naga nung masüba nübo mashi ka aruagi putusa putu alitsü akoker. Ibaji ILP ozüng anema lir. Ajisüaka Nagaland nung ozüng amshirtemi aji merajemer südi aser nübortemia memetet südi. Ibayongji, Nagaland nung asenok nungdak ajak ILP ozüng raksaa Nagaland nung senso küma amongertem dang nungi alir aser lia lia, joko, asenok parnok meliang taküm melitetsüsa kümogo. Ajisüaka, India telongjem kübok state asütsüsa Nagaland dang tesü akümbe state Arunachal Pradesh aser Mizoram ama nungbo iba ILP ozüng ya kanga takok ngua amshia aoba angur. Ano, küm ishika jakdang nungi Manipur nunga ILP kanga junga amshi tenzüko, anungji tangbo asenoka Imphal leni aotsü atema ILP nungdaksü. Aji oda, Nagaland nungbo ILP liaka Naga nung masüba nübo, talisa tüzumartem district ajak nung shishilembaba nung kibur kümer, Naga nungbo jangotsü ayokba dokan-a kata takok ngua mementetsüsa kümogo. Aji oda, ILP bener ita junga amongtsübaji ILP ozüng koba dang Bengal Eastern Frontier Regulation 1873 ta ajar, iba ozüng jagi memelar ser nung, parnokji Nagaland nung memongra asenokasabo taküma melitetsü amato asenoki asen lima tensa mapang ka yangluteta lir. Aji oda, iba ILP ozüng ya Dimapur nungbo mamshii aruba sülen taoba küm nungi amshi tenzüaka, asenoki ILP ozüngji Dimapur nung mapa küma mamshiteter aser asenokiang Dimapur nung ILP amshiba ajanga asenok akoksatsü amai bilemer. Tanü asenok iba jenjang tashiji bendanger kübok alar kümogo. Mizoram nungbo ILP ajanga aruba nisung kata dokan kibur kümer mangutsü. Kasaji, Arunachal nunga beshir aser Manipur nunga ILP ozüng ya takangba amshir. Ibayongji, Manipur nungbo küm nung ILP agütsüba fee nungi aruba sen aika government senpongi aier. Atangji, Nagaland nungbo ILP amertemang kibur kümdaksü masü saka küm nung ILP agütsüba fee nungi government senpongi aruba sen kwisa arur nübortemibo memetettsü südi. Aji oda, asenokia tang yabo ILP ya Trade permit masü saka Nagaland semdangertem asoshi anogo telatet ka atema temelaba agütsüba inyakyim ka lir ta angatetsüla aser ILP amer dokan lapoka shirshirtem yabo odaktsütsüla, kechiyong parnokji ILP ozüng raksartem lir, anungji parnokji asenoki melentsüla. Atangji, Nagaland tatar sendeni BEFR 1873 yanglushiba ozüng nung, Nagaland nung tangalen nungi arua tesayur mapa inyaktertem aser ano business tapu balala inyaktertem asoshi, parnok timmatemtsü atema ILP ya mapang talanglang atema agüja lir. Ajisüaka, parnoka mapang ka tongerbo 'renew' asütsü. Aji oda, asenoki kodang asenok taküm, temeten, sobaliba aser rongsen kümzüka ayutsü asoshi latetba ozüngtem meteta lidir, iba jagi asenok nem asen lima nung asenok kibur agi kilir kümer malitsüsa inyaksü tangatetba agütsütsü.

OLEMSABANG

TEMESEPBA (ALCOHOLISM)

~ Mr. Maong Jamir,
Secretary, Finance and Property, ABAM

(Iba ocet ya Ao Theological Association (ATA)-i adokba Laishir
Sangdong nung angutsü.)

(Yashi adok nungi...)

6. Yi ajemba teratem kar.

- 1) Kibong nung kinungtsü aser kinungbu tsüngda teti mangatetepi alir.
- 2) Kibong raksaba aser Balaluyu.
- 3) Tsürapuri tanur sayu/amshi mashiba.
- 4) Tsürabur aser tanur tsüngda tangatetep mali (generation gap)
- 5) Metemeri mesüzükba mesüra kangshia jemdaktsüba.
- 6) Tsürabur achi-ajem mazüokba.
- 7) Pei khuret, tebilemtsü mokoktetba ajanga.
- 8) Bulua anguba ajanga.
- 9) Tsürabur mapang nungi asen lokti benjongbentsü nung yi amshiba yimya.
- 10) Yi indang tangatetba mali (Lack of awareness).

Yi lar kodang kümdir, yi ajanga temang raksatsüba, rongsen jenjang raksatsüba, pei taküm jenjang raksatsüba, pei sempet samadaktsüba, tesendaktep raksadaktsüba, Tsüngrem nungi piladaktsüba aser ken ajem tenzüker melenshitsü tasak akümer ta mangatetba/ memeteti ajemba. Tesüba küm 16 yi aser drugs amshirtem den inyaka arudang ajangshiba ka ji;yi jemer aser drugs achir noklang nung 80-shi bo temalen aguja aliba kibong tebilemtsütem aser yi indang tangatetba maliba tera nungi adokba lir.

7. Yi jemer madokdaksütsü asoshi Kechi Inyaksüla?:

Engraji nung Prevention ta asübaji Ao oshi nung 'Nokdanga ayuba, azüoka ayuba mesüra tekümdangtsü lenmang sayua ayuba' ta ashitsü akok. Prevention ya tapu asemsü lemsar amshir:

- 1) **Primary Prevention:** Tetezü 'ano matalokdang, ano majurudang, ano majangshidang' sayua ayuba. Medical tsütsülen... tatishitsü agi; 'ano tashidak matongdang tekümdangtsü lenmang sayua ayuba.'

"Tatishitsü agi na lenmang nung jaja alidang nisung kari iba lenmang nung tarok ka lir ta shira iba tarokji nai paitoka aotsü aser lendong nungi kümzüksü, ibaji Primary prevention."

Primary Prevention ya ano yi indang kecha memeteti alibaburtem, mesüra ano mamshirtem nem tekümdangtsü tesayuba agütsüba dang ajar (Awareness on effects of Alcohol use). Iba tesayuba ya tanurtem Sunday School mapang nungi sayu tenzüksüla.

- 2) **Secondary prevention:** Tetezü 'ataloker, ajurur, ajangshir' alidang tesayuba mesüra teayari agütsüba dang ajar.

"Ne dang iba lenmang nungji tarok ka lir, mesüra lendong lir ta shingaia mashi, anungji na odang or iba tarok nungji asongtsü. Na tarok nung asonger lia yakta kari arua na yarira ibaji secondary prevention."

Iba mapa ya Non-Governmental Organization (NGO) temi inyaker. Tatishitsü ; NGO temi HIV aketer yariba, drugs aser yi achi-ajemertem yariba mesüraibala mesükba timtem jenjang nung alirtem yariba dang ajar. Iba den külemi Arogotemi koba detox sentong akar, ajak ya secondary prevention lir.

- 3) **Tertiary prevention:** Tetezü 'lendongi ir, kanga mejungi raksar, tashidak mejungi tur, taoksa jenti ajurur alidang' yariba dang ajar.

"Na tarok nung asonger teyarir mali timtemseta talangka lira, na yiruba aser temang raksabaji tali asütsü, yamaji ne temang yaritsü asoshi tasakba akümtsü. Iba dangji Tertiary Prevention ta ajar."

Iba jenjang nung alidang yaritsüji mapang kanga agir aser rongsen jenti endoker. Asenok Naga nung dak tashimait kaji lendongi ir, kanga mejungi raksar alidang yariteper. Engraji nung ashiba ama "Prevention is better than Cure" "Tanüptsü anguba dang nungi tashidak nungi nokdanga ayu tajungba" Tashidak noktanga ayuba nung rongsen tera endoker, saka tashidak adoker yariba nung rongsen tali aor, mapang-a tali agir aser taneptsü angutsü/mangutsü ji mejangjai yariteper. Tanü asen kibong, lokti nung lendong, timtem, shisabulu, tebilemtsütem ajak ya Primary Prevention makaba ajanga lir. Primary prevention ta asüba ya lokti tebilemtsütemajak nung nungdaka lir. Saka asen lokti nung lendongi ir aritepba yaritepba teimba angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

West Bengal nung tepuokdak aliba Khristantem bail nung chiok



August 21, 2026 nü West Bengal kübok Medinipur district nung court kati Khristantem bail nung chiokba sülen lawyers den külemi tangokba noksa nung angur.

August 24, 2026: West Bengal nung court kati jail nung puoka aliba Protestant Khristan trok bail nung chiokogo, ta osang ka ajanga metetdaksü.

Tawa Hindu nunger telok kati tai tonglochtsüba nung ajemdaker tetsür pezü densema Khristan trok police-i pua liasü.

Parnok apuba sülen anogo pongunü lir Medinipur district court-i parnok ajak nem bail agütsüogo, ta Arogo osang ka ajanga metetdaksü.

Osangbener den jembidang Archdiocese of Kolkata nung chancellor, Dominic Gomes-i, "Local court kati ozü nisungtem nem bail agütsüba atema pelar. August 16 anogo nungi parnok tepuokdak liasü," ta metetdaksü.

Khristantem tekülem sentong tagidak mapang nung Hindu nunger telok kati amakba sülen tang tashi Khristantem tetsübu nung lir, ta paisa metetdaksü.

Khristantem atema ken o jembitsür, advocate Aditya Tewari-i, nisung shia dang sen meyrjang kaka meshia bail nung chiokogo, aser sangküm January 16 nü iba ken o maneni angadangtsü, ta metetdaksü.

Bangiya Christiya Pariseba (Bengal Christian Council) state coordinator, Victor Behera-i, "Parnok bail nung chioktsü atema onoki lawyer trok ayonger liasü saka onok kanga shisabulua liasü, kechiyong police-i Arrla aika nung ken o benoka liasü, ajisüaka ozü nüburtem kümzüksüsa Tsüngremi mapa inyak," ta metetdaksü.

August 16 nü Hindu nunger telok kati Khristantem tekülem sentong tagidak mapang nung timtem agütsü, aser parnoki tai tonglochtsüba nung ajemdaker Khristan trokji apu.

Mednipur district kübok Dharma Rohilla yimdak Khristatem adenshia sarasadem sentong agia liasü. Khristan ka shirang aneptsüba

atema Tsüngrem nem tenünsang agütsütsü atema iba sentong ayongzüka temelungertem adenshia lia Hindu nungertemi amak.

Lokti jagi ki telung nung osettsüset raksatsüba den külemi Khristantem dak teka sangshi.

West Bengal nung Khristantem anema inyakba kanga bulua akümba anema August 23 nü Bengal kübok South 24 Parganas district nung BCP-i "Peace, Harmony & Prayer" rally ayongzüka agiogo.

BCP tentetsang, Herod

Mullick-i, "Khristantem aser rejutem amakba anentsü atema onoki takhangba agütsüogo," ta metetdaksü.

Herod Mullick-isa, Catholic aser Protestant densema denomination balala nungi Arogo 17-i iba rally nung shilem agiogo, ta metetdaksü.

Iba rally nungji state nung tesempa mapatem, sarasadem sentong tagidak mapang Khristantem nem timtem agütsüba, pastor tem dak azükba, police-i putir ka amokmerenba aser Khristan tasü mang ka leper nungi tutetba tatalokbatem aija liasü.

ANOGO ABEN TSÜNGREM DEN

Maneni ainba


Saka temeim nung ochi jembia ajak nung pa dak asenok aintsü (Ef.4:15)

Nüjiba asoshi Khristai asenok nüchi kümdaktsü (Gal. 5:1)

Khristan taküm nung takok anguba aser tejang atangbaji tangatetba ana akaba ajanga lir. Tenyar Paul-i zülü, "saka temeim nung ochi jembia ajak nung pa dak asenok aintsü, Paji tekolak, oda Khrista..." (Ef. 4:15,16). Khrista nung aintsü asoshi Tsüngremi asenok nüngdaktem ajak agütsü (II Peter 1:3) . Saka temeneni asenok ainbaji nokdanger aser asenok shiba , ano Khrista dak asenok kechi aka, item ajak metetba nungi anendaktsütsü atema temeneni tesümgangtsü mapa inyaker. Temeneni nokdangba koktet nungang asenok ainer. Tanabuba nung nüjiba. Tenyar Paul-i ashi, "Nüjiba asoshi Khristai asenok nüji kümdaktsü. Anungji akangakanga noktakang, aser tanaben alar süngra nung tapu" (Gal.5:1) Iba Lai yagi Tsüngremi asenok nüjiso kümdaktsünüba indang dang masü, asenok nüjibaji mekümdangra samadoktsüba indang-a tekümdangtsü ashir.

Khrista magizüki alidang, asenok temenen lar liasü. Saka Khrista agizükba ajanga, asenok madak temenen tashi samadok. Temenenji dang asenok dak kecha tashi mali. Na Khrista nung nüjiba lir, saka ibaji temenen ajanga mamangdaktsüra, nai kodanga nüjiba majangshitsü. Mapang tatsüka nung ajonga aintsü ta masü, saka Khrista nung aintsü koda tajung !

ChinaAid-i pastor ka chioktsü atema yariang ta US Tir dang mepishir



Pastor John Cao

Changsha (China), August 24 (Agencies): Chinese Communist Party (CCP)-i Pastor John Cao küm tenet tashi tepuokdak ayu aser pa America-i meyipa moudaktsütsü atema pa indang passport rakzüka ayu. Par kibong ya North Carolina nung alir, ajisüaka pa America-i mouteter.

Pastor Cao ya telidakbo US lir saka pa China nung lia apu. Pa dak metastatic prostate cancer putetogo, ibayongji pa par kidangi oa par kibong den külemi mongner, ajisüaka Communist Party-i pa nem passport agütsütsü memelunger.

Pastor Cao tang Changsha yimti nung arrshi küm 90 tetsü

den külemi lir.

Iba ama mapang ka nung Khristan melungtet telok ChinaAid-i pa tanaben US-i meyipa anir arutsü atema Tir Donald Trump dang teyari meshitsü asoshi mepishia petition ka tenzüka signature 100,000 bushir.

Taküm September ita nung China Tir, Xi Jinping-i Washington semdangba mapang nung US Tir, Donald Trump dang pastor Cao anir arutsü atema mepishidaktsütsü nükjidong nung ChinaAid-i iba petition tenzü.

ChinaAid tentetsang aser Tir, Bob Fu-i, "Iba lima nung joko pa mapang tatsüka dang

anünga alibaji pai par kibong züngsemtem den külemi mongnütsü," ta ashi.

Pastor Cao kinüngtsü Jamie Powell, par chirnur ana, semchir aser kibong züngsemtem tang North Carolina nung lir.

Bob Fu-i, "Talisa pai par semchir mezügbuba-a mongudang. Pa China nungi meyipa marutetba atema ni kanga jashi bilemstür," ta metetdaksü.

2017 küm pastor Cao apuba sülen ChinaAid-i tang agi tanabenbuba Cao chioktsü atema mepishitsür.

Tang ChinaAid-i evangelistic ministry Revelation Media den senteper iba petition ya tenzüka parnoki signature 100,000 nüngdaker.

August 16, 2026 nü tenzüka petition 'Help Bring Pastor Cao Home' nung tang tashi nung nisung 13,000 dak temai sign süogo.

Osangbener den jembidang Bob Fu-i, "Cao ya mapang talangka nungi medemer tajung ka lir. Ni kijung lanu asüba mapang nung mezüng US-i arudang pai ozü kibong kanga yaria liasü. Pastor Cao-i nisung jenti, talisa sensaker tanurtem kanga yaria aruogo," ta ashi.

Khristantem dang iba petition nungji sign asütsü tayongzükbaba agüja Fu-i, "Kodang temang nung shilem

ka timtemdir temang rangben timtemer. September 25 anogo nung White House nung Tir Trump-i China Tir Xi Jinping den senden amenba mapang maongka angutsü. Asenoki mepishiba ajanga tajung ka adoktsü," ta metetdaksü.

Pastor John Cao temang tamajungba dang akümer, kechiyong cancer mesenji teret tashi nunga prokshiogo.

China nung ketdangsertemi Cao indang passport meshizüka yua lir. 2024 küm pa US-i meyipa aotsü anogo ishika lia pai passport angu saka pa tayimtsüi ayaketa atutsü lia pa indang passport meshizüka ayu.

Cao-i China arrtsülen Myanmar kübok Kachin nung tanurtem atema school 16 lapoktsüba sülen 2017 küm China ketdangsertemi pa pua liasü.

Fu-i, "Cao-i Khrista temeim lemsatepba manener. Pai America nung Chinese Arogo tulutiba nung jangratema tenzüka liteta liasü, ajisüaka Tsüngrem tenyar ka ama pai Tsüngrem tajaba meteta par tetsü tasoli (China) nung ang Khrista temeim sangdongtsü lemtet aser sensaker tanurtem atema school aika lapoktsü," ta metetdaksü.

ChinaAid aser RevelationMedia nati jelia petition ji Chinese Embassy aser White House nem agütsütsü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züok

(v) marok nung tzü enokba, tzü khen nung ajemba
(pour water into another cup, drink in one gulp)

* Pongdang nung aliba tzü marok nung züok aser ajungaji khen nung züok.

Zükok

(v) shirang tamajungba aküm (seriously sick)

* Ni tanü ajungbena temang mejungi zükok.

OLONG PAITEP # 76029

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemasa - 3

OLONG PAITEP # 76028 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kiochtsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER

Navi Mumbai nungi Anshuman Jhingran-i Oceans Seven watangtetba atema otsü tasen ka yangluogo. Pai tenetbuba aser final crossing ji Japan nung aliba Tsugaru Channel watangba liasü.

June 30, 2026 nü Anshuman-i Tsugaru Channel watangtetba ajanga 'youngest male swimmer' naroküm angu. Pa arishi küm 21 ser ita 3 ser anogo 17 alidang ghonda 12 hours minute 39 aser second 29 nung iba otsü yanglua liasü.

Tripura CM-i tzümetsüing ajuruba tesemtem semdang

Agartala, August 24, 2026

(Agencies): Tripura Chief Minister Manik Saha-i Deobarnü Agartala nung tzümetsüing agi kongshiba tesemtem aser relief camps sema senzüogo.

Tripura kübok tesem aika nung tzüinglu kanga aruba sülen rescue & relief operations inyakba maparen pai meyipa reprangshi.

CM Saha-i tzümetsüing ajuruba tesemtem semdang aser Vivekananda School, Bardowali aser Ashram Chowmuhan nung lapoka aliba relief camps semdanga nübortem den sensaksem.

Chief Minister Saha-i Vivekananda School nung relief camp semdangdang tzümetsüing agi pei talidak toktsür aoba nisungtem den ajurutep aser nungdakba teyari agütsütsü nangzük.

State sorkar kanga kümküma lir aser ketdangsürtem den disaster management teams-i maneni dang mapa inyakdar ta pai ashi.

Baramura Hills nung tzüinglu kanga aruba ajanga Khowai aser West Tripura district tem nung ajungben tzümetsüing timtem ajurua liasü. Kasa tensaji August 2024 nunga atalokogo ta CM Saha-i ashi.

Tang tashi nung relief camps 17 lapokogo aser item nung kibong 413 nungi nisung 1,305 jenoka lir ta Chief Minister Saha-i ashi.

Tzümetsüing ajuruba tesemtem nung disaster response teams mapa lemozütsüogo aser rongtem amshia rescue & evacuation mapa inyaker ta paisa ashi.

"Onok kümküma lir. NDRF teams reserve nung yua lir. Councillors den party züngsemtem aser karyakartas-i mapa maneni inyakdar. West District kanga mejungi kongshiogo" ta Saha-isa metetdaksü.

Meitei Alliance-i aibelenertem dak nungi SoO agientsü akhanger

Imphal, August 24, 2026

(Agencies): Meitei Alliance-i Joint Monitoring Group (JMG) dang Kuki telungpur teloktem den Suspension of Operations (SoO) tripartite agreement agientsü shidi züluogo.

SoS kübok aliba Kuki telungpur teloktemi ground rule alema inyakshangshir iba tenangzüktep agientsüla ta Meitei Alliance-i shidi nung shia lir.

Sorkari telungpur teloktemi ozüing alema inyakshangshiba aser camp toktsür aoba onüktem Kuki National Organisation (KNO) aser United People's Front (UPF)-i magizüker. Ajisüaka, Meitei Alliance-i meyiper KNO aser UPF aitsüogo.

Meitei Alliance ya Meitei

nunger aser telok balala indang sabang ka lir aser parnoki Manipur kümzüka ayutsü, yimjung nung alitsü aser litsü kümzüka ayutsü atema noktaker.

Meitei Alliance-i regional, national aser international levels nung Meitei nunger dak sendakba onüktem atema noktaker.

JMG-i designated camps toktsüba aoba, rara alidaki prangpong bener aoba aser ozüing alema inyakba nung temulung agütsütsüla ta Meitei Alliance-i ashi.

Tanga teloktem dak tai tongloktüba ajanga KNO aser UPF mejenbur aser parnok züngsemtemi inyakba atema merenshitsüla ta parnokisa takhangba agütsü.

2025 ground rules yanglushiba sülen ketdangsürtemi monitoring reports, investigations aser punitive measures osang yimjak nung metetdaksütsüla ta Meitei Alliance-isa takhangba agütsüogo.

Civilians mesüra security personnel tepsetba, tashiyim agi sen meshiba, pur aoba aser teka sangshiba tatalokbatem Indian laws kübok benoka angadangtsüla ta parnokisa ashi.

Sorkar den ceasefire nung aliba telok karidang aibeleni inyaka lir parnok 'terror groups' ama züngoktsüla aser Centre sorkari ozüing lateta aliba ama inyaktsüla Meitei Alliance-isa metetdaksüogo.



Manipur Chief Minister Yumnam Khemchand Singh-i August 22, 2026 nü Imphal Smart City Mission kübok Mechanized Rotary Parking Facility lapoktsüogo. Iba facility ya Chungkham Leirak Machin anasa Nagamapal nung yanglua lir aser four-wheelers 42 aser two-wheelers 70 anentettsü.

Iran-i senotsü tsütsü timtem tulutiba ajurutsü: Scott Bessent

Washington, Luroi/August 24 (Agencies): Iran-i senotsü tsütsü timtem tulutiba ajurutsü aser US-Israel nati Iran den raraba tatemleni arur, ta US treasury secretary-i amokmeren.

US-i "economic D-Day" nung Iran den rongsenketzüng tesendaktep ajunga rakdangtsü aser linük kari danga Iran den senotsü tsütsü teka amteptsü merangra item linükji senzuka yutsütsü, ta Scott Bessent-i ashi.

US Tir Donald Trump indang administration-i taoba mapang amokmerena aliba aika melenshia aser anogo atsülangba sülen tang tesüsa Bessent nungi iba amokmeren o ya arur.

Iran-i Bessent amokmeren magizük aser rara manenra region nungi totzü bener aoba ajunga shibangtsü ta ashi.

Iran yimli-i ano par dang nungi temelaba magie Strait of Hormuz ajanga rong tem mesenzütsü tekumandangtsü tasen agütsüogo.

Alima nung totzü aser natural gas shilem 20 shi iba strait ajanga abener, saka February ita tatemlen nungi Iran-i par south tsütsü iba tzi lenmang nokdanga lir.

Bessent-i iba o ya Financial Times atema tangatetba lemsatepba nung ashi. Pai Iran nem rongsenketzüng tsütsü komala timtem agütsütsüar mashi saka Hombarnü

osangbener senden ka nung tejangjaba ashitsü imlar.

"Tehran kija maküm tashi, onoki rongsenkettsüing nung ajemdaker aliba ajak rakdangtsü nükjiding lir ta alimai angatettsüla," ta pai ashi.

Rara tenzüker arudang US-i Iran aiben amokmerena arua lir aser April ita nunga Trump-i, rara tembangtsü aser Strait of Hormuz lapoktsü atema Iran-i memulunga taonung civilisation ajunga asütsü, ta amokmerena liasü.

Pakistan tetsüngtai aiba sülen US-i par tebilemba melenshia liasü.

Iran yimli nem US-i rongsenketzüng tsütsü tenokdangba tesashi agüja lir.

Britain-i Ukraine nem missile agütsüba ya mi nung totzü enoktsüba ama asütsü: Kremlin

Moscow, Luroi/August 24 (Agencies): Kremlin-i Hombarnü ashiba agi, Britian-i Ukraine nem SCALP long-range cruise missiles yangludang amshiba British-made component tem indang classified information agütsütsü asoshi telemtetba agiba ya "mi nung totzü enoktsüba ama asütsü," aser Moscow-i iba ya khenyongi tai ta bilemer.

British Ato Kilonser Andy Burnham Hombarnü Kyiv-i ogo. PM mapa agizükba sülen tang mezüngbuba pai linük adena or tanga linük ka semdang, aser pai Ukraine nung long-range missiles tem yanglutsü atema Britian-i Kyiv nem teyari agütsütsü telemtetba agiba sangdongtsü.

PM-i Kyiv semdangba aser teyari agütsüba indang asüngdangba mapang Kremlin otongdar Dmitry Peskov-i, yimjung atema inyaktepba aliba nokdangtsü asoshi Britain-i takokba tashi inyakba atema parnok aitsüogo.

"Britain iba rara nung Kyiv den dena lir. Britain-i mapang shia mi nung totzü enoktsü aser yimjung atema inyaktepba aliba nokdangtsü asoshi sentongtem yanglua benoker," ta Peskov-i osangbenertem dang ashi.

Peskov-i ashiba agi, Russia military-i Ukraine nung missile yangluba tesemtem jangjatsü atema data tem bendendar aser iba amala tesemtem ya raksatsüyonga arudar.

Moscow-i taoba ita, Kyiv nem drone agütsüba atema parnoki telangzüba agütsütsü ta tekümdangtsü metetdaksüogo aser Britain-i iba rara nung taliba shilem agiba atema parnok aitsüogo.

Russia amaktsü atema tang mezüngbuba British-made drone tem amshiba indang osang temai adokba sülen iba tekümdangtsü ya metetdaksüogo.

Iba osang agütsüba mapang Burnham-i ashiba agi, iba rara

nung Ukraine nem noklang nung noklang teyari agütsütsü atema London bendanga agütsü lir.

Kasa mapang nung Hombarnü Ukraine nüjiso anguba anogmung nung tir Volodymyr Zelenskiy-i, Ukraine-i yimjung aginer, saka odangbo Russia nem bendanga magütsütsü, ta shiogo.

Soviet Union nungi Ukraine jakzüka or küm 35 ajungba anogo iba sentong nung bendanger lenirtem rongnung British Ato Kilonser Andy Burnham aser European Council tir Antonio Costa nata densema liasü.

Ukraine nunger indang sobaliba tola ka semer o jembiba mapang Zelenskiy-i, Finland, Denmark, Norway, Lithuania, Latvia aser Estonia nungi lenirtem iba sentong nung adentsü atema aruba asoshi kanga pelaba lemsatepba liasü. Paisa, Russia tir Vladimir Putin-i kiralongrar mapa inyakba ya anendaktsütsü atema lenmang kabosa bushitsü tenangzüka agüja liasü.

"Ukraine-i yimjung aginer, saka odangbo bendanga agütsütsü renema mali," ta Zelenskiy-i Telegram nung post asüba video ka nung ashi.

Zelenskiy-i ashiba agi, küm pezüser tesadang raraba sülen Russia-i eastern Donbas nung parnoki mazüokteti aliba tesemtem parnok nem bendanga agütsütsü asoshi akhangba nung ya dangbo parnok takhangba manentsü.

"Item ajak ya nisung kati Ukraine ya malitsüla ta bilemba ajanga lir," ta Zelenskiy-i ashi, koba Putin indang jembirba liasü.

2022 küm February 24 nü nungi Ukraine amak tenzüka sülen nisung meyrejang aika tepsetogo aser Ukraine nunger litsü aika tali mejungi kümdaktsüogo.

US teyongtsüi ia yimjung atema sensaksema arudar, saka

Russia-i Ukraine indang tesem kar parnok nem agütsütsü akhangba Kyiv-i magizükba ajanga sensaksem takok monguteti arudar.

Maneni Zelenskiy-i rara mapang Ukraine defence industry takoktem indang metetdaksü, kong naval drone aser mid- & long-range missile temi Russia kübok tesem balala amakba densema lir. Ajisüaka pai ashiba agi, mapa tinyaktsü aika anunga lir.

Pai, Ukrainian arms manufacturer Fire Point dang asükwa Russia den maneni toktepa raratsü atema Flamingo cruise missile tem takaratiba nung yanglutsü mepeshia liasü.

Ukraine ket nung anti-ballistic missile peria maliba maongka agia Russia-i tawa anüing ajanga Ukraine kübok yimti balala tali maka arudar.

Kasa mapang nung Ukraine-i Russia indang rongsenketzüng tashi meiti kümdaktsütsü atema refineries aser logistics infrastructure tem maka arudar. Ukraine-i Hombarnü online retailer Ozon meyong logistics hub pezü makogo.

Rara nung asürtem nem tetushi agütsüba mapang Zelenskiy-i parnok nem teyari agütsürtem dang iba rara tembangdaksütsü atema parnok nem tenügdakba ajak agütsütsü ayongzüko. "Onok atema rarajang ta asüngdang masü," ta pai ashi.

MULUNG NEN OLA

27/12/1941



17/08/2026

Asür Intimakla Pongen (Longjang), shirangba mapang aser la akümüli wadang tembanger mangyim nükztü neta mulungzürepa aliba mapang ozü den asüko lemsatepa mulungsüneptsür ajak dang mulung taroktiba nungi tepela aser mulungnen lemsateper.

Nenok sarasadem, temeim, rongsen aser nübu ajanga ozü mangyim mulung süngzüksüogo aser ibaji ozü mulung nung teti rizünga alitsü. Nenok temeim aser aria bilem ozüi meyipa magütsütetaka, Tsüngremer talubo temoatsü ajanga na aser nenok kibongtem süneptsütsü, anema yutsütsü aser moatsütsütsü ozü sarasadem.

~ Chirnur, semchirtem aser temeimbatem.



Office of the
Salang Club Longsa

Mokokchung, Nagaland

TENÜNGSANG AGÜTSÜR

Salang Club Longsa-i tejak tenteta **Imliakum A Pongen**, S/o Mr. Akangkokba Pongen & Mrs. Apokla Longkumer, nem CETSE 2025/NSSB examination ajanga Water Resources Department kübok Surveyor mapa ngutetba atema atema tenüngsang agütsür.

Nü mapa nung maneni takokba lidakjang ta moatsür. Tsüngremi na maneni moajang.

Sd/-
Tsuknungchiba
President



Sd/-
Moalila
Secretary

Office of the Mayanger Semchir Longkumer Sayir Kin Ungma TENÜNGSANG AGÜTSÜR



(Wt. Chubasangla Longkumer) (Wb. Mayangmeren Longkumer)

15th August 2026 Indian Independence anogo mung nung tsünglanglen agüja aliba senso anati pei inyakba wadang nung alakteta inyaktetba nungi kin nem konang nüngsang tulu bener arutsüba atema pelaba lemsateper.

1. Wt. Chubasangla Longkumer, NSS Joint Secretary Home (D/o Wb. T. Imo Longkumer & Wt. Onentila Jamir), Governor's Gold Medal.
2. Wb. Mayangmeren SSA office of the District Programme officer ICDS, Department of Social Welfare Mokokchung, (S/o Wb. Lt. Pangersowa & Wt. Imnatula), District Commendation award.

Nübur tenzüksü asoshi Tsüngremi nena moajang.

Sd/-
Wb. Shipongyanger Longkumer
Chairman, MSSK



Russia Tir Vladimir Putin aser Indian Foreign Minister Subrahmanya Jaishankar na Moscow nung aliba Senate Palace of the Kremlin nung ajurutepdang tangokba noksa nung angur.

CM-i Asia Games atema shimba asayar aser coach den ajurute p



Nagaland Chief Minister Dr. Neiphiu Rio-i Honibarnü Asian Games nung India tenü nungi shilem agitsü atema Nagaland nungi shimba asayar aser coach den ajurute pba mapang tangokba noksa nung angur.

Dimapur, Luroi/August 24

(TYO): Nagaland Chief Minister Dr. Neiphiu Rio-i Honibarnü ashiba agi, tanübo saisabong ajanga manger mesangwa tsüngda nisung ka nüngtugu kümdaktsür aser saisabong ya südoksünemtsü atema mesüra mapang entoktsü atema dang masü kümogo.

20buba Asian Games nung India tenü nungi shilem agitsü atema Nagaland nungi asayar aser coach pezü shimogo. Iba asayamung ya Japan nung September 19 nungi October 4 tashi asayatsü. Asayartem rongnung Sepaktakraw asayar Menenu Tsukru aser Seyiekhrieno Tepa na densema lir aser coach ana ya Puleno Neikha aser Pungotolu Puro na lir.

Iba den ano Indian Army nung Junior Commissioned Officer aser Nagaland nungi para-athlete asayar Hokato Hotozhe Sema-a Asian Games nung asayatsü aser pa tang Pune nung Army Sports Training Facility nung training

agidar.

Sovima nung Hombarnü sentong ka agiba mapang asayartem aser coach tem ajungshia Rio-i, state nung asaya balala nung asayartem renloka aotsü asoshi lenmang sadema lapoka lir, saka parnok ya anitetsü nüngdaker ajita asünung dang asayartem linük aser state asoshi konang tetushi bener arudaktsütsü, ta ashi. Lanurtem dak sempet tajung aika aliba reprangteta sorkari asayartem anitetsü asoshi sports facility tem tajungba kuma yanglushidar, ta paisa shisem.

Chief Minister, shiba Nagaland Olympic Association tir lir pai, bendanga agüja inyakba, temulungtetba tulu aliba aser meranga inyakba ajanga nenok Nagaland tenü nungi dang asayar masü saka India team nung züngsem kaka kümogo, ta ashi. Paisa, nenok takok ajanga taruba puty lanur asayartem ajungmesotsü, anungji iba khuret angatetsü aser takok tashi tajungtiba

asayatsüla ta shia parnok ajungshi.

Kasa mapang nung Athletics Federation of India, Vice president and Nagaland Olympic Association, Secretary General, Abu Metha-i, iba asaya nung India tenü nungi asayatsü asoshi maangka anguba ya linük yangerba nung asenokia teyari agütsüba ka lir ta ashi.

Paisa, Nagaland nungi asayar 15-i international jenjang nung India tenü nungi asayaago, aser parnok aika saisapong ajanga sorkar agency aser central organization tem nung mapang tajung ngur lir. Parnok ya asayartem atema tajungshiba ka lir, ta ashi. Paisa, nenoki dang bendanga agüja meranga inyakra nenok career tajung asütsü, ta ashi.

Team ya Hombarnü national team training camp atema Sonipat Haryana-i apusoago. Training camp ya September 14 tashi agitsü. Indian contingent ya Japan-i September 15 nü apusoa aotsü.

1buba Longleng District Football League tembangogo

Dimapur, Luroi/August 24

(TYO): 1buba Longleng District Football League August 22 nü tembangogo. Asayamung shibangba sentong nung MLA & Advisor, Airways & Railways, A. Pongshi Phom alakteta jaoker liasü.

Sentong nung o jembiba mapang Pongshi-i, Longleng District Football Association-i ayongzükbä 1buba Longleng District Football League 2026 shibangba sentong nung pa-a shilem agitetba atema kanga pelaba lemsatep.

Paisa, district nung timtem lendong tulu ataloker aliba mapang shirnokisa teyari tulu agütsüogo, parnok ajak dang pelaba lemsatep.

Pongshi-i, bendanga agüja meranga inyakba sülen final tongtetertem nem tenünsang

agütsü.

Ano pai, district nung iba amala tongtibang asayamung ka ayongzükbä aser lanurtem asayartem nem parnok nükjidong ataloktsü atema sabang tajung agütsüba atema tir aser pai aniba team aser Planning Committee nem tenünsang agütsü.

Pai, LDFA dang lanurtem ajungkettsü atema iba amala inyakyim maneni benoka inyaktsü asoshi ajungshia liasü. Pai iba asayamung ya amajokbo masütsü kechiyong lanur asayartem taruba 25buba Dr. T. Ao, Inter-District Football Championship 2026 nung asayatsü asoshi maangka angutsü, ta ashi.

Maneni pai, Aizawl Football Club indang Indian Football League (IFL) License alizüktsü

atema mulungtepba sülen Nagaland United Sports Club national football nung shilem agitsü renema lir ta ashi. All-India Football Federation (AIFF)-i agizükra Nagaland United indang home asayatem Dimapur nung asayatsü, ta pai ashi.

Sentong nung LDFA tir Pangnau Phom-i lokti pela agizükba o jembiba aser T. Chumoi Phom-i ken tajung ka tena liasü.

Final asaya nung United Nyenching Club-i goal 2-1 agi Irenic FC akok. Asayamung nung jurila sempet agizükertem: Best Coach, Laimeishem Club, P. Bushing Phom; Emerging Player, Chingyang Y Phom, Ya-Ouh FC; Best Player aser Golden Boot, I. Phongyei Phom, Irenic FC; Best Goalkeeper, Y. Baiang Phom.

DDCA-i Inter-Club Cricket asayamung indang metetdaktsü

Dimapur, Luroi/August 24
(TYO): Dimapur District Cricket Association (DDCA)-i sangdong ka ajanga, taruba Dimapur District Inter-Club Cricket Tournament August 31 nungi tenzüka asayatsü ta metetdaktsüogo.

Dimapur district kübok züngoksema aliba cricket club tem dang iba asayamung atema mapang shitak nung züngoksemtsü asoshi kasa sangdong ajanga metetdaktsüogo.

Asayamung nung shilem agitsü atema züngoksemtsü asoshi tatembangbuba anogoji August 28 nü asütsü.

Asayamung ya August 31 nü tenzüksü.

Asayamung nung shilem

agitsü aliba asayartem Original Aadhaar Card, Original Birth Certificate aser tawa tangokba passport-sized photograph kaka agütsütsü nüngdaker, ta DDCA-isa metetdaktsü.

Club ketdangsürtem dang temalen shisema aliba kuli kakettertem den parnok indang team list August 28 nü tashi nungbo benoktsü metetdaktsüogo. Atakzükja aliba mapang tembangba sülen arurtem magizüktsü, ta ketdangsürtemisa metetdaktsü.

Asayamung atema züngoksemtsü mesüra tanga osang tejangja agitsü atema DDCA den item number; 8794545053 & 8257019330 ajanga tongteprateptsü asoshi DDCA tir-i metetdaktsüogo.

Gauff aser Fils nati Cincinnati Open titles benogo



Coco Gauff

Luroi/August 24, 2026

(Agencies): Coco Gauff-i külem America tsür Jessica Pegula, 6-2, 6-4 agi koka tang agi tanabenbuba Cincinnati Open title benogo. Taruba hopta US Open masaya tsüngda iba asayamung akokaba ajanga la kanga temulung lemteta kümdaktsütsü.

Kasa asayamung tebur kija asaya nung France nunger asayar Arthur Fils-i 6-3, 1-6, 6-0 agi America nunger Frances Tiafoe koka tang mezügbuba Masters 1000 title ka benogo. Deobarnü final nung tang mezügbuba ATP Masters 1000 final ka nung tanak nisung ana asayaago.

Gauff-i 2023 küm iba asayamung final nung Karolina Muchova akok aser kasa küm US Open nung mezügbuba Grand Slam koka liasü. Final nung la yakta dang 5-0 agi tejakdang aküm aser 6-2 agi asaya akok. Tanabuba set nungbo Pegula-ia meranga asaya-a 5-4 aküm saka Gauff-i taruba game nung asaya kokatok. Gauff-i breakpoint trok nungi pongubo koka liasü.

Cincinnati final nung 1970

küm tatemsa America tsür ana asaya liasü. Iba asaya nung Rosie Casals-i Nancy Richey koka liasü.

Honibarnü semifinal nung Pegula-i defending champion Iga Swiatek akok aser Gauff-i Sara Bejlek koka liasü.

Kasa asayamung tebur kija asaya final asaya Fils-i koka, pa ya Ben Shelton aser Jo-Wilfried Tsonga na sülen Masters 1000 title abenba tanak nisung tasembuba kümogo.

Arishi küm 22 tain Fils ya France nunger rongnungi Masters 1000 ka akokba tanobusang kümogo. Pa ya Guy Forget (1991) sülen Cincinnati asayamung akokba France nunger asayar tanabuba kümogo.

Tiafoe tang agi tanabenbuba Cincinnati Open final asayaago. 2024 küm pa Jannik Sinner-i tsükdakja liasü. Pa ya Andy Roddick sülen iba asayamung akokba America nunger tanabuba asayar akümstsü meranga liasü.

Tatembanbuba game nung Tiafoe-i championship points asem tashi kümzüik, saka pai Fils menokdangteti asaya makok.

BILEMDANGANG

"Anema aliba dak alaka tanga jangradem kecha mali."